

কেবল প্রশান্তি বেলা অ-বেলায় কাইউম পারভেজ

শুভ নববর্ষ ।

হে প্রতিপালক আমার
জীবন মরণের প্রভু -
কৃতজ্ঞতা অশেষ তোমাকে
সুযোগ দিলে আমাকে
নববর্ষের শুভেচ্ছা দিতে
বন্ধু স্বজন সব্বাইকে আবার ।

এই আমি কী তাই দিতে পারতাম
যদি থাকতাম
সেই বাসটিতে যেখানে
মানুষ স্বপ্ন ভালবাসা রাজনীতি অর্থনীতি
সব পোড়ে একসাথে !
চাপাতির ফলা তাড়া করে ফেরে
মুক্তমনা মানুষ । যেখানে
সাম্প্রদায়িকতাহীন ভালবাসার
পঙক্তিমাল্লা সাজানো থরে থরে ।

এই আমি কী তাই দিতে পারতাম
যদি থাকতাম
সেই বাসটিতে যেখানে
চালকের আসনে হেল্লার !
রাতের আঁধারে যমদূতের সাথে পাল্লা যার ।
দশ বিশ পঁচিশ তিরিশ মারছে দেদার ।
ট্রলার ও লঞ্জে বাহাদুরীর ধাক্কাধাক্কি
নিয়ে নেয় শতপ্রাণ জবাবদীহি নাই করবার ।

এই আমি কী তাই দিতে পারতাম
যদি থাকতাম
সেই হাসপাতালে যেখানে
শয্যা আছে আঁধার আছে
আশার আলো আছে টিমটিম
আছে ক'জন চিকিৎসকের ঘর
নেই কোন গুণ্ডা পথ্য চিকিৎসকের খবর ।
সাতদিনের লড়াইয়ে ছেলেটি হেরে গেল
নববর্ষের ঠিক আগে ।

হে প্রতিপালক আমার
জীবন মরণের প্রভু
কৃতজ্ঞতা অশেষ তোমাকে
সুযোগ দিলে আমাকে
বন্ধু স্বজন সব্বাইকে আবার ।





নববর্ষের শুভেচ্ছা দিতে
হে প্রতিপালক আমার
জীবন মরণের প্রভু
রেখো সেই পোড়া ডোবা শকট শবদের
নববর্ষের মেলায়
সূর্য ডোবে না সেথায়
শান্তিতে প্রাণটা যেথা জুড়ায় ।

বাবা মা গেছেন তো সেই কবে
নববর্ষে কিছু বলার সুযোগ নেই আর
হে প্রতিপালক আমার
জীবন মরণের প্রভু
রেখো তাঁদের সেই নববর্ষের মেলায়
সূর্য ডোবে না যেথায়
কেবল প্রশান্তি বেলা অ-বেলায় ।